

Vestland fylke
Postboks 7900
5020 Bergen

Osterøy heradsstyre
Geitaryggen 8
5282 Lonevåg

Brev frå Osterøy heradsstyre til politikarane i Vestland fylke
Kopi: Hordalandsbenken (Stortinget), Samferdselsavdelinga, Vestland fylkeskommune

Fredag 26. november gjekk det eit stort steinras på Bruvikveien (Fv 5418) vest for Kløve. Når dette er skrive er det venta at vegen vil vera stengd i fleire veker medan sikring av fjellsida og reparasjon av det seks meter breie holet i vegen pågår.

Bruvik grunnkrets talde 259 personar ved årsskiftet, og dette er ei levande bygd med butikk, kyrkje, lagsliv og mykje aktivitet. Borna i området har skuleskyss til Haus og Hatland via fylkesveg 5418. Trafikken har auka merkbar dei siste åra etter at friluftsfolk i regionen har oppdaga Bruvik, Brøknipa og dei andre toppane rundt Bruvikdalen som attraktive reisemål.

Det siste tiåret har fleire jord- og steinras skada fylkesvegen mellom Kvisti og Bruvik. Heldigvis har ingen liv gått tapt, og ein har oftast makta å opna vegen att kort tid etter rasa. Det som vekker uro er at dei kjem oftare enn før, og ved iallfall to høve har bussen passert berre kort tid før rasa.

- 26. november 2020
Stort steinras vest for Kløve. Vegen kan verta stengd i fleire veker.
- 10. januar 2020
Mindre steinras ved Slotteberget som er omkjøringsvegen om Bruvikdalen og Saksli.
- 7. januar 2020
Ras på Hundhamaren. Vegen stengd i nokre timar.
- 10. desember 2019
Tre og anna bråte rasar ut i vegen ved Hundhammar. Vegen stengt i nokre timar.
- 24. januar 2018
Stor stein og fleire mindre steinar rasar ut i vegbana på Blom.
- 23. desember 2017
Jord og stein rasar ut i vegen ved Helleberget.
- 7. desember 2017
Jord- og steinras på Einhamaren.
- 10. august 2016
Jord- og steinras på Ytre Hekland og Heklandslia.
- 7. september 2015
Stort steinras på Einhamaren. Vegen var stengt i to dagar.
- 1. juni 2012
Stort steinras mellom Ytre og Indre Bruvik. Vegen var stengd i fleire dagar.

Lista viser berre dei store rasa dei siste ti åra. I tillegg har det gått mange mindre jord- og steinras som ikkje er nemnt her fordi dei har ikkje stengt vegen. Offisielt er dette einaste vegen inn til Bruvik; Den private skogsvegen over Saksli er ikkje eit godt alternativ til fylkesvegen, og vegen opp dit er heller ikkje trygg; ref. steinraset i Slotteberget 10. januar i år.

Vi er takksame for arbeidet med å sikra nokre av dei kjente raspunkta langs vegen dei siste åra, men Osterøy heradsstyre er likevel særst uroa over utviklinga, særleg med tanke på aukande nedbørsmengder som fører til fleire og større ras enn tidlegare. Det vert farlegare å både bu og reisa til Bruvik, særleg i vinterhalvåret.

Osterøy heradsstyre ber vegeigar ta ansvar for å sette i gang eit forprosjekt der det overordna målet er å redusere risikoen for at liv og helse går tapt som følge av jord- og steinras langs fylkesveg 5418 mellom Stokke og Bruvik. Vi er kjent med at det tidleg på 2000-talet og fram til nyleg er laga ei rekke faglege grunnlag som både handlar om omlegging av vegen, og rasvurderingar. I forprosjektet må ein samle denne kunnskapen, og eventuelt oppdatere etter dagens krav og standard. Vi ber om at forprosjektet skisserer opp ulike alternativ for å gjere vegen tryggare, i kva grad slikt arbeid kan føregå i større etappar, prioritera tiltaka og komme med kostnadsalkylar på eit overordna nivå.

Vi vonar at fylkestinget tek godt imot denne oppmodinga og ser fram til ein løysingsorientert dialog om trafikksikring av fylkesveg 5418 innan kort tid.

Med beste helsing,

Osterøy heradsstyre